

## **Бақара сураси, 245-оят**

09:50 / 28.03.2018 3582

**Аллоҳга яхши қарз берадиган ким борки, У унга бир неча мартага күпайтириб берса. Ҳолбуки, Аллоҳ (ризқни) төр қилур ва кенг қилур. Ва Үнгагина қайтариласизлар.** Бақара 245.

Яхшилик йўлида, савоб касб қилиш мақсадида сарф қилинадиган маблағ, мол-мулк «Аллоҳ таолога қарз бериш» деб аталмоқда.

**«Аллоҳга яхши қарз берадиган ким борки...»**

Аллоҳнинг дини йўлига ким пул сарфласа, Аллоҳга яхши қарз берган бўлар экан. Қарз берган одам фурсати келганда берган маблағини тўлиғича қайтариб олади. Ундан ҳеч нарса камаймайди. Шунингдек, Аллоҳнинг йўлида пул-мол сарфлаган одамнинг ҳам маблағи камаймайди. Балки:

**«...У унга бир неча мартага күпайтириб берса».**

Яъни Аллоҳ таоло унинг яхшилик йўлида сарфлаган молини бир неча баробар күпайтириб беради. Бу дунёда молига мол қўшади, барака беради, баҳт-саодат ва роҳат-фароғатга эриштиради. У дунёда эса жаннатга киритиб, битмас-туғанмас неъматлар ато этиб, Ўзининг розилигини эълон қиласди.

Ўлим ва ҳаёт Аллоҳнинг қўлида бўлганидек, ризқ ҳам Аллоҳнинг қўлидадир. Жангда қатнашган одам ўлиб қолавермаганидек, молини Аллоҳнинг йўлида сарфлаган киши ҳам камбағал бўлиб қолавермайди. Ҳаммаси Аллоҳнинг ихтиёрида:

**«Ҳолбуки, Аллоҳ (ризқни) төр қилур ва кенг қилур».**

Аллоҳ ризқни төр қиласман деса, нафақа қилмаган, Аллоҳнинг йўлида ҳеч нарса сарфламаган, ҳар тангани етти еридан тукканларникини ҳам төр қилиб қўяверади. Кенг қиласман деса, топганини Аллоҳнинг йўлида сарфлаётганларникини янада кенг қиласверади. Ҳар не бўлганда ҳам, бориладиган жой бир:

**«Ва Үнгагина қайтариласизлар».**

Бошқага қайтарилиш йўқ.

Үтган азизларимиз ушбу ҳақиқатни тушуниб етғанликлари учун дунёга устоз бўлганлар. Мисол учун, улардан оддийгина бир киши Абу Даҳдаҳ розияллоҳу анхуни олиб кўрайлик. Ибн Аби Ҳотим Абдуллоҳ ибн Масъуд розияллоҳу анхудан ривоят қилишларича, «Аллоҳга яхши қарз берадиган ким бор» ояти нозил бўлганида, Абу Даҳдаҳ Ансорий:

- Эй Аллоҳнинг Расули, Аллоҳ азза ва жалла биздан қарз сўраяптими? – деди. Набий алайҳиссалом:
- Ҳа, эй Абу Даҳдаҳ, – дедилар. Абу Даҳдаҳ:
- Қўлингизни беринг, эй Аллоҳнинг Расули, – деди. У зоти бобаракот қўлларини бердилар. Абу Даҳдаҳ:
- Мен Роббимга қўрғонимни қарз бердим, – деди. Унинг қўрғонида олти юз туп хурмоси ва хотин, бола-чақаси бор эди. У келиб:
- Ҳой, Умму Даҳдаҳ! – деб хотинини чақирди.
- Лаббай, – деган жавобни эшитганда:
- Қўрғондан чиқ, мен уни Роббимга қарз бердим, – деди. У:
- Ҳўп, – деб болаларини олиб чиқди.